

## 勸孝編

太倉唐文治蔚芝著

人之行莫大於孝。不孝則非人也。余曩撰孝經大義附大孝終身慕父母義三篇。復編孝經講義。又纂孝經救世編。茲更約舉其主要精微者爲勸孝編。學者日省而力行焉。人心世道庶有豸乎。

### 節文篇第一

(孝之節文當以曲禮內則爲法)

孝者。天之經。地之義。民之行。舉古今中外莫能外焉者也。顧孝道有二。曰節文。曰精意。近今以來。雖搢紳之家。亦或略節文而不講。不知節文廢棄。則精意亦無由而達。而非孝無親之說。遂得簧鼓其間。可痛也。茲先就節文之淺顯者。言之一。曰起居出入之節。爲人子者。必當如曲禮出必告。反必面。非獨瞻仰父母之安否。亦以見所習。必有業。而可慰親心也。二曰衣服飲食之節。必如樂正子春視父母之疾。加一飯。加一衣。則脫然愈。損一飯。損一衣。亦脫然愈。親心且皆

喜焉。禮記所謂冬溫夏清。昏定晨省。漢黃香嘗溫親被。何後世未聞有繼起者。定省之儀更復懵焉。忽焉。試思父母養育其子女。冬夏陰陽寒暑之宜。其體貼周至。爲何如。蓼莪之詩曰。父兮生我。母兮鞠我。拊我畜我。長我育我。顧我復我。出入腹我。余嘗謂此九我字。喚醒人子之良心。如晨鐘暮鼓。至于生鞠拊畜。長育顧復。腹九字。蓋親心無時無刻。莫不繫于其子之身。而顧我復我。腹三者。令爲人子者。讀之不覺潸然淚下矣。所謂欲報之德。昊天罔極也。又內則篇載進盥少者奉漿。長者奉水。請沃盥。盥卒授巾。問所欲而敬進之。柔色以溫之。脂膏以膏之。冠帶垢和灰請漱。衣裳垢和灰請澣。衣裳綻裂。紉箴請補。綴勤之至。儉之至。和之至。而孝亦至焉。乃近世爲子者。出不告。反不面。冬不溫。夏不清。不敬不柔。杖履衣裳漫不注意。詩言無父何怙。無母何恃。而父母暮年。對于人子。轉絕無依賴。嗚呼。家庭之際。非可以報施言也。然卽以報施言之。試問人子。

之心安耶。否耶。嗚呼。古禮不講。世道日衰。孝行之廢棄久矣。而運會之厄。遂無底止哀哉。

精意篇第一（終身慕父母當法虞舜之大孝）

孝之節文。吾既言之矣。精意維何。思慕其親是也。孟子言人少則慕父母。又言五十而慕者。予於大舜見之矣。蓋人當少時。孺慕真誠一心。惟知有父母而已。孟子又曰。樂則生矣。不知手之舞之。足之蹈之。孝經曰。親生之膝下以養。當人在膝下之時。跳躍歡喜。手舞足蹈。縱使督過教答。徬徨涕泣。不逾時而即依。父母膝下者。慕之至也。皆生機生理之所發也。是爲赤子之心。一點良知。萬古不滅。家教所由興。家道所由立。卽在於此。故聖人定父母之名曰親。莫親于在母胎之中。迨呱呱墮地。則較疎矣。三年而免於父母之懷。則又疎矣。十年而後或就師傅。或營生計。至二十而後。則更疎矣。往而不返者。年也。逝而不可追者。

親也。不幸而父母棄養。負土安葬。從此則疎之又疎矣。以極親之父母。至於極疎。而不可追。痛何如矣。此人子所當及時以盡孝也。蓋人子之身。雖常有離父母之時。人子之心。永無離父母之時。爲其思慕而不忘也。此思慕之忱。其分數有多寡焉。聖賢則純乎全焉。其次則或得五六焉。其次則或得二三焉。不肖者。倏然泯滅焉。則其去禽獸不遠矣。然而一人世途。凡遷吾慕。損吾慕。滅吾慕者。不知凡幾。聲色貨利之交。侵也。妻子臣妾之相間也。悖德悖禮之事。紛乘於我前也。而吾慕父母之心。舉人間世。萬端之嗜欲。皆不得眩我惑我。而奪我之慕也。孟子曰。大人者不失其赤子之心者也。

春暉篇第三 (依戀膝下之年人生最當寶貴)

大戴禮記曾子疾病篇曰。人之生也。百年之中。有疾病焉。有老幼焉。君子思其不可復者。而先施焉。父母既歿。雖欲孝。誰爲孝乎。年既耆艾。雖欲悌。誰爲悌乎。